

Augsburg, 29. September 1564

An Johannes Oporinus

UB Basel, Fr. Gr. I 11, fol. 275r.  
Steinmann Nr. 765.

S. P. D. Thobias mihi breuem abs te schedam reddidit, qua scribis, te fratri meo misisse 8 Suidas, quod mihi gratum est. 60 quos vna cum literis per Willeri famulum te mittere scribis, nondum accepi. Sed vbi accepero, 20 exempla Villinger mittam. reliqua 40, quoniam ea est tua liberalitas, etsi tot non opus est, debebo tibi. Literis tuis mense Iulio datis ita territus sum, vt Isocratem seposuerim, non ita tamen, quin praelum occupare possim. Sed quia dubito quid facere possis in hac rerum omnium perturbatione, nihil tibi missurus sum, nisi iussus. Paraenesin tamen graecam nunc mitto, si forte opus inchoare velles, ne incorrecto codice vtereris. Fama hic fuit, vxorem tuam esse mortuam, sed spero erratum esse. Nam vtcunque caetera sint, τήν τε τριγαμίαν καὶ τήν χηρείαν incommodiorem tibi fore crederem. Deus, Mi D. Oporine, te conseruet et gubernet. Nos etiam pestilentia recrudescens solicitos habet praeter alia multa. πλείη μὲν γὰρ γαῖα κακῶν, πλείη δὲ θάλασσα. Vale. Augustae Vindelicorum. 3 Cal[endas] Octobris 1564.

Codicem Basilij repetere iussus sum a magistratu. Satis temporibus fuit, si illo vti voluit Heruagius. Sin vti nolet: rectius erit in herili bibliotheca. Praefationes omnes omittas velim et recte a Paraenesi auspiceris. De Inscriptione et dedicatione deliberabimus per ocium. Graecolatina editio Norimbergae, a fratre meo oblatum anno 1553: superbe repudiata fuit. Aut igitur ἀπροοιμίαστος erit Isocrates, aut alium patronum quaeret. Iterum vale, ac te et sumptu et labore, quantum poteris leuato. Scis illud σώματα πολλὰ τρέφειν. Beatus eris, si vno atque altero praelo mercenarias operas feceris. τὶ δ' αἰσχρὸν, ἢν μὴ τοῖσι χρωμένοις δοκεῖ; praesertim cum videas neminem tuis laboribus referre gratiam, et τόκοι τόκων sine lucro te deuorent. Vale et ignosce importunitati. Nam ex animo rebus tuis consultum cupio, atque vtinam opibus te subleuare possem.

Hiero[nymus] Wolfius  
Tuus.